



贈中大夫山東布政司右叅政忠所錢公
暨陸太淑人神道碑銘

不佞錫自爲諸生神徃藝林鴻寶必醉李

二錢云大錢爲御冷宮端小錢爲康侯藩

伯相傳與余家裔俱出臨安未諦也爾時

余意得奉螯弧中原相與譜錦衣玉冊之

世次不自料糠粃居前丙辰之役宮端與

其叔爾先學憲偕爲余射覆得而宮端旋

奉

顯皇宸擢第一天下艷余門有同姓龍頭且雋
若藉咸而是時藩伯已先登第官鳩曹推
分惠存稔金昆之道義淵深而岳立蓋沐
浴家學非偶然者洛程蜀蘇庶擬鸞章鳳
苞非二到雙丁絺繪堪匹也今歲丁卯

新聖登極之涂月宮端昆弟將啓贈中大夫山
左大叅忠所公之玄域奉封太淑人陸偕

藏屬隧道之言於不佞蓋官端昆弟收淚
籲曰先公道重河汾蚤秘豹彩默冀高閔
於二孤二孤不能及先公之目一致上尊
養牛卽太淑人榆景躬際

三聖重熙再綰玄紵而憂傷強半今且劍弓與
紛帛借潛鳥鳥何心並唏風木業乞誌於
朱少師乞傳於陳眉公兩先生顧非並得
先生椽筆曷以爲隧道光余不敏間與藩

伯俱怯風林之毅卽交親表章槩爾閣筆
而宮端昆弟數幸臨之風雨鷄鳴義存弗
晦今幸

龍飛盛際廓靈燭昏卷阿二鳳偕噓借雖不佞
卽長伏菰蘆寧遺壤缶之音於

聖世是用敢碑贈公與太淑人公爲故吳越武
肅王後勝國時有修職郎國馮者侯嘉興
國徙箸焉國馮之二三傳爲世華餼于庠世

華生萼治岐黃著醫海二百卷萼再傳爲
栢峯公貞以賢書歷官汝寧貳守有惠政
貞生贈大叅心亭公吾仁以茂才遊國學
孝友饒幹畧里中推祭酒配贈淑人曹是
生公公諱繼科字進甫忠所其號娶於陸
是爲封太淑人長汀丞正心女公玉立白
皙方願豐下弱冠爲邑諸生酣飫經術試
輒傾其儕輩爭冀建鼓樹旗公夷然志不

在利名也讀書遇古人格言警句錄之赫
蹠銘座右欣然庶幾執鞭年十八娶太淑
人偕事心亭公夫婦心亭公故有聲里中
英特雋邁見常出庸俗之表公與太淑人
承顏接詞無幾微忤薦新進珍得昕夕歡
嘗鼎構舍西偏食指衆曹淑人慮勿給也
太淑人攝衽佐之饗餐畢治比落成析箸
新居應屬冢君而公故有弟衛幕公跽告

父曰兒安故廬新者幸予弟也父重違公
意議予貲飭圮壞比歿勿果予公亦不言
時以爲讓宅有河東之風其友愛衛幕公
至老彌篤皆此類心亭公病鬲幾一年公
迎醫千里外商確藥餌色焦然夜數十起
而太淑人淪茗進之心亭公憊必強飲曰
此新婦手調也比歿公鷄骨見衣衾太淑
人亦哀痛成禮曹淑人老而作苦如季文

伯母公不欲峻勸傷老人意每笑言婉解
曹淑人亦灑然止蓋後心亨公色養若而
年而公又先謝世每以不獲送徑爲恨固
終身孺子慕矣公德宇弘博持守峻方其
與人言寧爲布帛母爲矛戟緩辭冲氣一
衷老氏處後守雌之旨居常儲藥予病儲
衣予寒儲櫪予道殣貧交贈綈假貸還券
卽有負義勿置牙頰也贖故人史氏子有

平仲風經紀任友闔門之疫死有魯山諄
釋竊貲娶婦之奴有乖崖量置私盜瓜茹
之園丁有公儀休心其他義田義倉嘗有
其志而力未逮至與人交關財產錙銖必
公平未嘗乘急減值有祖姑朱老無子別
業與公隣欲相畀公義弗受晚年旁畝漸
拓喟然知止遂勅家人弗復言田舍舍有
隙地構清鑒之堂自號閔棲居士夷猶其

中梧竹桑榆陰映几席秋晚黃花尤爲邑
中奇邁而公尤銳意式穀宮端昆弟舞象
時卽手錄經史百家言課之不丙夜不休
比知搯觚延名師寘臯比或聯文社拈題
危坐臨之焚膏不倦已鵲起有聲遂自絕
意應舉曰吾其閑放讓孺子一頭地矣青
霞映坐公折節異片言之鑪錘而太淑人
伏屏間聽其語有當則飭厨飲進或蒹葭

伊人遠不可致公又爲兩子治裝趣問業
而所勤誨必古人忠孝廉節事曰士有三
品道德爲先阿世曲學吾弗願見于兒曹
也公望高鄭鄉雖年未逮下壽而邑大夫
安城謝侯延爲大賓固謝弗克辭卒嚴更
老之禮春秋甫週甲竟以萬曆戊申仲秋
捐館族哭于寢友哭于堂輿臺扈養哭于
里咸曰天乎何奪我忠所之遽者太淑人

代公而事曹淑人婦而兼子自詠栢舟益
兢兢朝暮雖分宅別居而奚婢壺餐趾相
錯于巷嘗陡患危疾曹淑人寤而驚曰天
惠老人弗厄賢婦曹年八十而太淑人亦
踰耆矣自十五作嫁裳至視姑含歛其情
文密匪有非近代閨闈及者先是長汀公
之教太淑人也不及書史曰婦奉箕帚而
已豈效咕嗶作女博士而太淑人質性明

穎動與道合方于歸時值家中落裝送單
簡叔姒盛孺人之來麗桂香奩太淑人弗
爲動姒不能秉家失尊童歡而太淑人據
助之迄老情同胞乳尤虔蒸禘吉蠲惟先
心亭公夫婦忌辰必敬祀推及于汝寧公
曰是舅姑生時所致虔也及宮端昆弟能
主鬯猶躬自苾飭以先其課宮端昆弟寓
嚴于慈鳩車之戲輒循禮法長而夏葛冬

褐俾無失名士風宮端弱冠時贈公爲市
一衣表統裏絮宮端請易其裏公笑領之
太淑人怒勿許也師友文盟觴豆離煥而
燕居不過臠肉贈公性弘雅不問米鹽凌
雜太淑人佐以嚴明童婢凜凜受事雖戶
內無呼暴聲而率作弗怠先鳴鷄興後聞
鐘寢瞭視燿火拂拭匱櫥拮据至古稀如
一日家奕奕起而不以一錢私同產兄弟

惟爲長汀公置墓田供歲祭而已神識明
茂器量宏達藩伯成進士賀客滿座上及
宮端繼成鼎元里闐震炫而太淑人不色
喜門有依附聲光夤緣趾闕救一二老蒼
頭謹衛關謝勿納以故宮端昆弟累載敷
歷合中兒無煩縣官三尺者比相次錦旋
暨以

朝命一再上繡鬚明璫易贈公隧道之題至銜

金紫且推勳三世及心亭公太淑人每莊
謂曰官爵儻來猶市盈虛猶水潮汐兒等
能致身雲霄甚善不負先公熬燭料簡社
章矣抑先公三品之訓云何百尺竿頭有
嚮上者宮端昆弟謹受教議迎養京邸而
性安家食則相與以大官奉爲伏臘資太
淑人封識不啓曰毋以老人滫瀡捐養廉
資也藩伯始郎比部奉

命欽恤三輔太淑人戒無失入藩伯以故平反
踰徃常及治粟津關有奸商蠹國賦藩伯
將峻繩之貽書俾衷情法之平宮端予寧
歸省會藩伯有封疆之役時

哲皇帝御世矣太淑人色憂趣宮端裝入

朝日輦下去關門聲息遙聯汝去而偵爾弟可
安老人且鼎湖再泣國更大故非汝卽安
時也宮端遂以辛酉赴

闕與余共纂

顯皇帝實錄踰載復請急歸藩伯亦竣封疆事
便道省戲彩雙雙極犀錦宮袍之貴太淑
人爾時亦榮盛矣無何藩伯以直道中蜚
語事且不測太淑人憂悸爲廢眠餐及事
解相慰勞而疾已入膏肓遂患滯下不復
起享年七十五時天啓乙丑仲冬也卒時
猶聽宮端稱述西方忽悟電露皈依大慈

觀音體氣柔潔云贈公與太淑人存歿賚
封俱用仲子蚤達伯子雖大魁而秩未登
峻猶有待焉余聞贈公甲辰寢疾夢神人
放大光明以兩黃蓋罩其上今纍纍驗矣
宮端神彩端凝社稷之器漸而履揆作霖
與藩伯極瀟綸之用則公孤崇號方貢松
楸今日穹碑壁立尚非公與淑人一成之
公案也余文慙幼婦哲景林宗辭不獲命

敢畧子孫嫁娶爵里之詳而摭大端爲銘
銘曰龍飛鳳舞肇錢唐勝國猶傳修職郎
王孫白晳願且方讀書不艷利名場娶于
平原協占凰恭鞫鞠臆承高堂辭新就圮
友愛光多行仁義心悅康有子式穀開青
箱敦詩悅禮看騰驤生尊憲老歿

綸章公輔游絳何渠央太慈婦順母儀臧妯娌
先後傳芬芳碩果不落家門昌黃標蕊榜

彤廷揚肅括門戶凜紀綱大兒子含趣成
裝木天緇讐恣翺翔仲子關門鎖鑰當徃
剪天驕履胡霜生承紫誥腰金相禮宗懷
清美且雙我銘馬鬣封之傍過者式車爲
彷徨丹扉麟閣重開祥別有

宸奎書煌煌

賜進士出身前南京吏部右侍郎通議大夫禮
部右侍郎兼翰林院侍讀學士協理詹事

府事

經筵日講

實錄副總裁知

制誥纂修官通家眷侍生雲間錢龍錫頓首拜

謨

賜進士出身翰林院簡討纂修

玉牒

起居註門下晚學生吳士元纂修

賜進士出身翰林院簡討纂修

實錄

經筵展書官門下晚學生劉宇亮書丹

錢贈公暨配陸太淑人行狀

武塘錢宮允錢方伯兄弟之交愚兄弟也
有年矣習其家世贈公積學敦行濬發兩
賢陸太君實克相之宮允兄弟先後登朝
顯名著作紀綱之地每以不及祿養贈公
爲憾嘗思以六珈五鼎歲歲稱太君千秋
庶幾所未展于椿庭者盡展于椿樹歲丙
寅太君以天年終將襄大事手勒兩尊人

行實乞余爲狀余雖不文敢不爲論次其
崖畧贈公姓錢氏諱繼科字進甫別號忠
所先世臨安人元至正間修職郎國馮領
嘉興侯因家焉

皇明宣德初析嘉興東北爲嘉善遂爲嘉善人
國馮生汝正汝正生修修生瓊瓊生世華
爲邑諸生入餼廩始以儒術起家世華生
萼兼通醫緝醫海二百卷萼生炳炳生郡

丞栢峯公貞舉嘉靖丁酉賢書仕閩尤溪
令有善政歷陞揚州汝寧貳守郡丞公生
贈山東布政司右叅政心亭公吾仁是爲
公父以諸生入太學娶曹淑人生二子長
卽公公生而孝友嫺睦溫恭退讓篤學好
修少有聲膠庠奮志進取乃困未得志遂
一意教子宮允兄弟才情翩翩善讀父書
提誨有加每延名師傅于家塾又令擔簦

行狀
從四方名流問業以故學日進主盟文苑
本公義方爲多公天性至孝事父母承顏
順志務先意以從所欲父構新居于西偏
極輪奐之美公讓不居而不欲有讓之名
請于父曰兒樂舊居願安之乞毋徙後新
構竟歸第其善體父志以不言類如此父
病遠近迎醫躬親湯藥衣不解帶者畢歲
至大故哀毀骨立遇忌辰奠獻哭泣如初

生平無競于世耻言人過不知有機械事
接人無疾言遽色卽有忤者情恕理遣性
樂施慕義待以舉火者甚衆有祖姑適朱
老無子欲以比隣之產減值售公公堅不
受故人子史某以貧鬻身公傷之爲捐金
贖歸友人任某一門病疫人皆避去公身
自省視歿而經紀其喪歲置衣以衣寒無
孺者製藥以療病不能求醫者凶歲施棺

掩骼無算父歿後事母曹色養愛日母七
箸稍進喜動眉宇否則務百方以誘食治
家寬臧獲婢子有小過務掩之有僕乘火
肱篋以娶婦或請置之法公曰彼迫欲得
偶故出此若窮詰必去妻姑已之園丁竊
蔬或告公公笑曰已嚮其利者爲有德彼
利多灌園必力蔬殖必廣我坐享其餘不
亦可乎居恒欲倣古人之義田義學以收

族而有志未遑以此屬伯仲更以忠孝廉
節相勉嘗取古人格言粘壁間伯仲仕宦
通顯硜硜不失尺寸豈遜萬石三槐家法
耶宅隅有隙地誅茅治圃種竹藝菊顏其
堂曰清鑒更號閒棲居士邑令安城謝侯
負人倫鑒以鄉大賓禮公公固辭謝侯親
勸駕成禮世交重焉公長身豐頤含德之
厚飲人以和法宜上壽而僅週花甲天固

欲留不盡于後人乎公以文學祭酒授鴻臚序班後以仲子貴初贈刑部主事再贈大名府知府三贈山東布政司右叅政宮允滿翰撰考公已授承德之贈競爽申錫正未艾故止稱贈公公生于嘉靖戊申殿于萬曆戊申享年六十有一娶陸太淑人淑人系出淨池父長汀丞鳳池公正心母顧氏淑人少端靜聰慧鳳池公謂女子不

必通書史乃淑人高下在心進止有度一似閑于內則者年十五歸贈公衆以少齡異之有趙姬善鑿曰他日必宜家而亢宗非弱植者入門主饋同贈公孝養尊章洗腆治俎翁姑皆喜稱新婦賢尤加意蒸嘗虔潔案盛率子姓肅共將事惟謹贈公寬然長者不屑屑問家人生計淑人篝燈佐讀拮据勤家俾贈公無內顧得以潛心大

業贈公困未逢年每以義命慰解宮允兄弟舞象時卽令就外傳不爲姑息及伯仲鋒鏑日露師友日廣文酒宴集淑人擊鮮烹肥咄嗟而辦愛而能勞故伯仲嚴母訓甚于嚴君迨二子通籍訓諸孫亦然與贈公同侍翁心亭公寢疾以至彌留夙夜不遑寧處喪塋備物成禮贈公奄忽捐館淑人痛絕強食率二子慎終營塋一如所以

襄翁大事者贈公每以不克終事母曹淑人爲恨淑人率孫孝養愈篤曹淑人年八十有餘考終端然化去玉箸雙垂淑人戚易兼至可謂善體贈公未竟之志矣淑人初嫁時父家中落治奩具體而已後舉二子湯餅宴喜皆淑人手自操作以充其費叔娶于盛盛姒爲侍御公愛女百兩裝送鮮華奪目洗兒之日筐篚充庭金玉璀璨

淑人恬然處其中不爲色動亦不意阻及
二難升華鼎甲含香于玉署外臺整旅于
金虎人情艷羨問閨拭目淑人毫無色喜
每戒伯仲當滿宜謙持盈以巽約束家衆
無與閩外門庭如水當盛衰冷熱之際賢
者或不能無稍動而喜愠不形初終如一
養定若有道者豈尋常閨閣之流哉淑人
勤儉起家至老不倦辨色夙興丙夜未寢

宮允嘗勸曰母今日猶苦爲生難耶淑人
謂我自樂此不爲疲用以示後人母忘秀
才家風耳淑人不佞佛而性甘淡泊無兼
味無重采晚而戒殺有福德而不受具菩
提心卧病時宮允爲稱說淨土往生之因
頓然有悟臨歿時命眷屬無悲泣誦彌陀
佛號數千聲又令誦觀音大士數千聲畧
無恐怖沾戀而瞑體中輕軟與姑曹淑人

化去時光景相類此非夙根堅強慧性超
朗不染着于無始以來之塵垢何能至此
耶淑人生于嘉靖辛亥十二月二十九日
歿于天啓乙丑十一月初五日享年七十
有五初封安人再封恭人三封淑人淑人
年十五而配贈公配四十二年而離贈公
離又十八年而與贈公合葬同穴同心豈
偶然哉子二長士升丙辰進士第一人

翰林修撰陞左春坊左中允次士晉癸丑
進士歷官河南右布政士升娶孫氏封孺
人順昌令賓江孫公女士晉娶沈氏贈淑
人吏部員外淮槎沈公女繼娶張氏封淑
人貢生三級張公女女二一早天一適御
史遂初王公長子兆胤孫男五士升出者
二格庠生娶南兵部郎中蘧庵吳公女棟
聘孝廉發交陳公女士晉出者三梅太學

生娶太學伯潤徐公女茶庠生娶太學見
陶顧公女樵庠生聘僉憲承庵毛公女孫
女三士升出者二一適給事中鹿吳葉公
季子培志一適吏部郎中冰壺沈公嗣子
世泊士晉出者一字孝廉仲執顧公子榮嗣
曾孫男三梅出者二一夔二龍茶出者一
四維曾孫女三梅出一茶出一格出一皆
幼未字今上天啓七年十二月
日舉

淑人樞啓贈公壙合塋焉謹狀惟

師相閣下採擇而賜之銘

賜進士第中憲大夫詹事府少詹事兼翰林
院侍讀學士前掌南京翰林院侍讀學士
右春坊諭德中允贊善兼本院侍讀編修
檢討直

起居注纂輯章奏管理文官

誥勅

行狀

行狀
正史纂修官眷侍生陳懿典撰

錢母陸淑人傳

陸淑人者

誥贈中大夫山東右叅政忠所錢公之配宮允
抑之方伯康侯之母也錢氏出表忠裔元
有修職郎國馮者自臨安領嘉興侯因家
焉尋析爲嘉善人四傳爲邑廩生世華其
子萼精於醫纂醫海二百卷萼生炳炳生
貞是日栢峯公中嘉靖丁酉鄉試令尤溪

歷揚州汝寧二守以廉吏稱栢峯生心亭
公吾仁入太學贈叅政娶曹贈淑人舉二
丈夫子長卽贈公贈公自少醇謹卓然以
儀軌自居及長議婚得長汀丞陸公女十
五來歸保母趙媪睨而嘆曰新婦神明意
審矯矯道上異日褊幢褕翟中人也旣廟
見出朝尊章調御上下逡巡皆有方局宗
人不敢以年少目之矣初裝遣廉薄已叔

媼盛孺人入門統綺相照環珮之聲璆然
淑人處之晏如盛產兒外家具文襍錦褙
犀錢玉菓相屬而淑人舉子但率女奴治
臬以供湯餅客而已然淑人待盛無間言
每事推掖之使前調護甚力贈公當析箸
探策得西第輪奐方新堅以遜其仲而自
處故居稍稍漸理堂構經營部署悉出淑
人手中卽心亭翁嘗許葺治費不忍索也

既居別宅去曹太君僅百武淑人起居不
離側老嫗小奚遣餉趾相錯數偵其所餐
加損爲憂喜太君常繆爲勇噉以慰之心
亭翁病牖贈公與淑人承響牀第間侍疾
不解帶治喪不勝衣諱日生辰饋奠飲泣
卽推及王舅王姑率子姓跪拜如禮潔齊
謹恪說者謂其有詩禮薦浣采蘋之風贈
公性弘恕不喜苛察園丁有竊瓜者家人

有乘火攫金去而娶婦者悉貫勿問反好
語囑之曰無爲主母所知而淑人則治家
嗃嗃男女不比肩寢興不失度賞罰不僭
約卽夜半猶秉燭省視曰鷄鶩逸乎犬飯
乎門牝闔乎竈突燿火不息乎則又呼其
子而質之曰而渴欲茗乎而餒欲餅餌乎
而寒欲加衿乎如是數四乃卽安贈公遇
荒施賑遇疾施藥衣食無告之人瘞埋無

主之骨峻却祖姑比隣之產贖史生鬻兒
撫任氏一門疫厲沒而經紀其喪入以告
之淑人淑人贊嘆從史惟力是視不忍以
拮据織嗇謝也贈公嘗笑曰家乘有健婦
書種有佳兒豈復褰縫掖埋沒枯螢老蠹
中哉遂謝去公車日以課子爲事手錄古
人格言警語榜之屏障間諄諄以忠孝廉
節相勸勉淑人更以方嚴佐之未辨色蹴

使興燭垂跋趣再讀鏗落浮華封蔀混沌
凡一切大人遊少年場以及詩壇酒政之
豪舉非唯不使近且不習也文社有會贈
公拈題危坐淑人走爨下張具繼以燃膏
未嘗敢告饒賢師友過從爲咄嗟立辦皆
豐腆而約束二子不過數臠肉三浣衣稍
請更易瞪目怒不許曰孺子輩乃敢快意
耶康侯癸丑成進士抑之登丙辰殿試第

一賀者傾城涸巷來觀淑人痛贈公不及見也謝客拒筐篚間有趨羶附熱者禁勅勿與通曰先君子嚴義利謹取予處後守雌素風如昔若導之關說長吏漁獵細民吾家兒羞而不忍爲也嘗語仲子曰汝司寇無以三尺法穿人于丹書語伯子曰汝史氏無以七尺管篋人于青史二子退而識之康侯欽恤二輔多所平反抑之修

神廟實錄不輕置衮鉞一字翳惟淑人有紳訓焉贈公玉立白皙方頤豐下與人交溫洽詳緩觸之不怒挑之不爭不乘急減值不小惠市名客有負責者歸其券有負心者則俛而笑曰此宿世事也笑而貸之邑大夫謝公嚴以老更之禮一徃輒不赴栽梧種菊顏其堂曰清鑒更自號閔棲居士日與仲弟衛幕公出入飲食必與俱怡怡如

也淑人待外家無私假私與待兩婦無左袒右袒質明而起操作如壯時勸之盍少休嘆曰惟懷與安實敗名季文子之母樂羊子之妻何人哉晚年戒殺好竺乾先生之言彌留時命眷屬環念大悲觀音者數千聲氣體香潔柔和如生雖不學佛故是學佛作家然巫覡師尼及見鬼人等則門庭削跡矣抑之名士升康侯名士晉海內

號稱兩錢比於眉山二蘇金華二陸云陳子曰贈公戊申前逝淑人優游祿養幾十五年抑之康侯似可少釋終天之憾而語次輒泣不自勝曰吾于兩親有至痛先公手抄六籍百家言授以句讀日望以名世而不聞兩兒南宮報一痛也臚傳首選遠近識一面者皆爲額手而淑人追念先公反爲之喜極而悲歛噓罷飲一痛也兄弟

傳
晝遊京輦擬以板輿迎母來重去家不可
強一痛也士升艱子淑人禱禳以祈多男
今舉兩雄長者娶婦褁青衿次者讀書已
上口矣而母與先公會否對笑地下乎一
痛也弟代北門守兄乞南陔養而晉有疆
場之役母大憂已觸瑤燄幾叵測母聞之
又大怖一痛也今

王聖時清禍本頓拔兩兄弟方將式歌且舞以

薦膝前太平之觴而母不我待一痛也六
痛填膺九原誰告所恃以不朽吾親者在
志表傳朱少師錢宗伯業已憐而許之矣
兩公衮而史子布衣而史敢稽首載拜以
請是故陳子不辭爲之傳

通家陳繼儒頓首拜撰



